

**Туман ҳокимининг ўринбосари – туман инвестициялар
ва ташқи савдо бўлими бошлиғининг функционал вазифалари ҳамда
фаолиятининг энг муҳим самарадорлик кўрсаткичлари тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикасининг “Маҳаллий давлат ҳокимияти тўғрисида”ги Қонунига, Ўзбекистон Республикаси Президентининг ва Вазирлар Маҳкамасининг ҳужжатларига, шунингдек, бошқа норматив-ҳуқуқий ҳужжатларга мувофиқ туман ҳокимининг ўринбосари – инвестициялар ва ташқи савдо бўлими бошлиғи (кейинги ўринларда – туман ҳокимининг ўринбосари)нинг асосий вазифалари, функциялари, ҳуқуқлари, шахсий масъулияти, ваколати ва жавобгарлиги ҳамда энг муҳим самарадорлик кўрсаткичларини белгилайди.

2. Туман ҳокимининг ўринбосари ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президенти ва Ҳукуматнинг ҳужжатларига, тегишли халқ депутатлари Кенгашининг қарорларига, вилоят ва туман ҳокимининг қарорлари ва фармойишларига, шунингдек, ушбу Низомга амал қилади.

3. Туман ҳокимининг ўринбосари ўзига бириктирилган тармоқ ва соҳалардаги фаолиятининг самарадорлиги ва натижадорлиги, ўз фаолиятида Ўзбекистон Республикаси Президенти ҳамда Вазирлар Маҳкамасининг ҳужжатлари ва топшириқларининг тўлиқ ва сифатли бажарилишини ташкил этиш учун **Ўзбекистон Республикасининг Президенти олдида шахсан жавобгар** ҳамда тегишли халқ депутатлари Кенгаши олдида ҳисобдордир.

4. Туман ҳокимининг ўринбосари туман ҳокимига бўйсунди.

Туман ҳокимининг ўринбосари ўзига бириктирилган тармоқ ва соҳаларда ҳудудларни ривожлантириш билан боғлиқ вазифаларни ҳал қилиш бўйича фаолияти **Вилоят ҳокимининг ўринбосари - инвестициялар ва ташқи савдо бошқармаси бошлиғи томонидан мувофиқлаштирилади.**

5. Туман ҳокимининг ўринбосари фаолияти натижадорлиги **ушбу Низомга иловага мувофиқ энг муҳим самарадорлик кўрсаткичлари асосида белгиланган тартибда баҳоланади.**

6. Туман ҳокимининг ўринбосари туман инвестициялар ва ташқи савдо бўлими фаолиятини мувофиқлаштиради.

7. Туман ҳокимининг ўринбосари ўз ваколати даврида илмий ва педагогик фаолиятдан ташқари ҳақ тўланадиган бошқа турдаги фаолият билан шуғулланиши мумкин эмас.

2-боб. Туман ҳокими ўринбосарининг асосий вазифалари ва функциялари

8. Туман ҳокимининг ўринбосари асосий вазифалари ҳисобланади:

инвестиция дастурларига киритилган лойиҳаларнинг амалга оширилишини таъминлаш, хорижий инвестицияларни жалб этиш ва самарали ўзлаштириш;

худуднинг экспорт салоҳиятини ошириш, маҳаллий корхоналар маҳсулотларининг экспорт ҳажмлари, номенклатураси ҳамда географиясини кенгайтириш бўйича манзилли дастурларни ишлаб чиқиш ҳамда уларнинг ижросини таъминлаш;

илмий ва илмий-техникавий фаолиятни амалга ошириш, илмий-техникавий ва инновацион ривожланишни таъминлаш;

эркин иқтисодий зоналарни ривожлантириш ҳамда экспортбop ва импорт ўрнини босувчи маҳсулотлар ишлаб чиқариш учун шарт-шароитлар яратиш;

кичик саноат зоналарининг самарали фаолиятини ташкил этиш, уларда рақобатбардош замонавий ишлаб чиқаришлар ва кичик корхоналарни ривожлантириш.

9. Туман ҳокимининг ўринбосари ўз зиммасига юкланган вазифаларни бажариш учун қуйидаги функцияларни амалга оширади:

а) инвестиция дастурларига киритилган лойиҳаларнинг амалга оширилишини таъминлаш, хорижий инвестицияларни жалб этиш ва самарали ўзлаштириш соҳасида:

инвестиция дастурларига киритилган лойиҳаларнинг ўз муддатида ва сифатли амалга оширилишини таъминлайди;

инвестиция фаолияти йўналишида худудда бошқарув тизимини, шу жумладан **хорижий инвестицияларни жалб этиш ва ўзлаштириш соҳасида худудда давлат органлари ва ташкилотларининг худудий тузилмалари фаолиятини мувофиқлаштиради**, хорижий инвесторларни худуднинг имкониятлари ва салоҳияти тўғрисида хабардор қилиш, **хорижий капитал иштирокидаги корхоналарни ривожлантиришни қўллаб-қувватлашга** қаратилган ишларни рағбатлантиради;

инвестиция дастурларини, жумладан худудий дастурларни шакллантириш, жалб этилган маблағларни ўзлаштириш соҳасидаги ишларни мувофиқлаштиради;

ҳар ҳафтанинг чоршанба куни худуд бўйича “Инвестиция куни” тадбирларини ўтказиш ишларини ташкил этиш, инвестиция лойиҳаларини амалга ошириш борасидаги ишларни мувофиқлаштириш, салоҳиятли инвесторларни аниқлаш ва улар билан музокаралар ўтказиш, инвесторларнинг муаммоларини ҳал қилиш бўйича тизимли ишларни олиб боради;

инвестиция лойиҳалари амалга оширилишининг тизимли мониторингини олиб бориш, хорижий капитал иштирокидаги корхоналар фаолиятини, инвестор томонидан ўзининг инвестиция мажбуриятлари тўлиқ бажарилишини таҳлил қилиш, **хорижий инвестициялар иштирокида инвестиция лойиҳаларининг ўз вақтида ва самарали амалга оширилишига тўсқинлик қилаётган омилларни аниқлаш ҳамда уларни ҳал этиш юзасидан тезкор чоралар кўриш** орқали жалб этилаётган хорижий инвестициялардан фойдаланиш самарадорлигини ошириш, инвестиция дастурларини амалга оширишнинг сифат ва самарадорлик мезонларига асосланган баҳолаш тизимини амалда тадбиқ этади;

Ўзбекистон Республикасининг хорижий давлатлардаги элчилари ва консуллари билан яқин ҳамкорликда ҳудудда ишлаб чиқариладиган маҳсулотлар, ишлар (хизматлар) экспортини кенгайтириш ва диверсификация қилиш, тўғридан-тўғри хорижий инвестициялар ва илғор технологияларини жалб этиш, ҳудуднинг савдо-иқтисодий, молиявий-инвестициявий ва илмий-техник имкониятларини мустаҳкамлаш чораларини кўради;

хорижий инвестициялар ва кредитларни жалб этиш учун инвестиция таклифларининг ягона базасини шакллантириш ва янгилаш жараёнини мувофиқлаштиришни таъминлаш, шунингдек, Ўзбекистон Республикасида яратилган инвестиция муҳити, шу жумладан инвестиция киритиш жараёнининг асосий тартиб-таомили масалалари, шунингдек, амалга ошириш таклиф этилаётган инвестиция таклифлари тўғрисидаги ахборотни салоҳиятли инвесторлар ва кредиторларга етказиши;

хорижий инвестициялар иштирокидаги инвестиция лойиҳалари бўйича лойиҳаолди ва лойиҳа ҳужжатларини ишлаб чиқиш борасида лойиҳа институтлари ҳамда республика ташкилотлари билан самарали ҳамкорликни ташкил этади;

ҳудуднинг ишлаб чиқариш салоҳияти ва инвестицияларга бўлган эҳтиёжи, олдиндан ҳисоб-китоб қилинган аниқ лойиҳалар ҳамда салоҳиятли инвесторлар учун қизиқиш уйғотадиган бошқа ахборот акс эттирилган ҳудуднинг интерфаол инвестиция харитасини ишлаб чиқиш ҳамда унинг фаолиятини таъминлаш ишларини мувофиқлаштиради;

молиялаштиришнинг турли манбалари, шу жумладан тўғридан-тўғри хорижий инвестициялар ҳисобидан ҳудуднинг иқтисодиёт тармоқлари ва ижтимоий соҳасини юксалтириш ҳамда мувозанатли ривожлантириш суръатларининг инвестиция ресурсларига бўлган эҳтиёжлар билан боғлиқлигини таъминлашга доир таклифларни ишлаб чиқади;

инвестиция дастурлари доирасида маблағлар жалб этилиши ҳамда ўзлаштирилиши бўйича белгиланган прогноз параметрларнинг бажарилиши учун тизимли ва қатъий назоратни ташкил қилиш, шунингдек, инвестиция лойиҳаларини амалга ошириш ҳолатини комплекс таҳлил қилиш ҳамда мониторинг давомида аниқланган муаммоларни бартараф этиш юзасидан таклифлар киритади;

худудий инвестиция дастурларига киритилган инвестиция лойиҳалари бўйича маълумотлар базаси яратилишини, юритилишини ҳамда мунтазам янгиланишини таъминлайди;

б) худуднинг экспорт салоҳиятини ошириш, маҳаллий корхоналар маҳсулотларининг экспорт ҳажмлари, номенклатураси ҳамда географиясини кенгайтириш бўйича манзилли дастурларни ишлаб чиқиш ҳамда уларнинг ижросини таъминлаш соҳасида:

худуднинг экспорт салоҳиятини кенгайтириш дастурларини ишлаб чиқиш ва амалга оширилишини таъминлаш, корхоналарнинг, шу жумладан кичик ва хусусий тадбиркорлик субъектларининг экспорт номенклатурасини кенгайтириш ва ҳажмларини ошириш бўйича комплекс чора-тадбирларни амалга оширади;

худудий экспорт штабларининг фаолиятини бошқаради, худудий корхоналарнинг экспорт маҳсулотлари ва экспортчилари бўйича маълумотлар базасининг юритилишини таъминлайди, маҳаллий корхоналарга экспортни ташкил этишда кўмаклашади;

худудий корхоналар экспорт прогнозининг бажарилиши ҳолати бўйича мониторинг олиб бориш, бунинг асосида уларнинг экспорт фаолиятини таҳлил қилиш ва корхоналар экспортини жадаллаштириш ва рағбатлантириш бўйича аниқ таклифлар ишлаб чиқади;

худудий корхоналарнинг ишлаб чиқариш салоҳиятини ўрганиш асосида уларнинг мавжуд экспорт захираларини аниқлаш ва улардан самарали фойдаланишни ташкил этади;

худудий корхоналарга экспорт салоҳиятини ривожлантириш бўйича савдо-саноат кўргазмалари, ярмаркалар, форумлар, такдимотлар, конференциялар ва бошқа тадбирларда иштирок этишда кўмаклашади, шундай тадбирларни худудда ташкил этади ва ўтказиши;

экспорт қилувчи тадбиркорлик субъектларини қўллаб-қувватлаш, тижорат банкларининг экспорттолки кредитлари бўйича компенсация тақдим этишни ташкиллаштиради ва мувофиқлаштиради;

в) илмий ва илмий-техник фаолиятни амалга ошириш, илмий-техник ва инновацион ривожланишни таъминлаш соҳасида:

худудда илмий ва илмий-техник фаолиятни амалга ошириш, илмий-техник ва инновацион ривожланишни таъминлаш учун қулай шарт-шароитларни яратади, илм-фан, инновацион фаолият ва ишлаб чиқариш ўртасида интеграцияни кучайтиради;

худудда илм-фан, таълим ва ишлаб чиқариш ўртасида интеграцияни кучайтириш асосида худуднинг илмий салоҳиятини ва инновацион ривожлантиришга қаратилган изчил чора-тадбирларни амалга оширади;

инновацион лойиҳалар-стартапларни ишлаб чиқиш, синовдан ўтказиш ва ўзлаштириш, инновацион фаолият натижаларини трансфер қилиш ва тижоратлаштиришни амалга оширувчи инновацион ғоялар,

ишланмалар ва технологиялар марказлари билан ҳамкорликда ҳудудни ижтимоий-иқтисодий ривожлантиришда инновациялар ва илғор юқори технологияларни жорий қилиш учун зарур шарт-шароит яратишга қаратилган изчил чора-тадбирларни ишлаб чиқади ва амалга оширади;

илм-фан соҳасини ва инновацион ривожлантиришга доир ҳудудий дастурларни ишлаб чиқиш, уларнинг бажарилиши юзасидан назорат ўрнатиш, шунингдек, ҳудудни ижтимоий-иқтисодий ривожлантиришга қаратилган илмий ва инновацион лойиҳаларни амалга ошириш учун зарур инвестицияларни жалб этади;

ҳудудда инновацион инфратузилмани шакллантириш, шу жумладан ихтисослаштирилган илмий-тажриба ташкилотлари, юқори технологиялар марказлари ва технологик парклар фаолиятини самарали йўлга қўйишни таъминлайди;

ёшларни илм-фан ва инновацион фаолиятга жалб қилиш, ёш олимларнинг илмий ва инновацион ишланмаларини ишлаб чиқаришга жорий этиш ва уларни ҳар томонлама қўллаб-қувватлаш бўйича тизимли ишларни олиб боради;

республика олимларининг илмий-амалий ва инновацион лойиҳалари ҳамда ишланмалари учун хўжалик юритувчи субъектларнинг буюртмалари портфелини шакллантиради;

д) кичик саноат зоналарининг самарали фаолиятини ташкил этиш, уларда рақобатбардош замонавий ишлаб чиқаришлар ва кичик корхоналарни ривожлантириш соҳасида:

кичик саноат зоналари маъмурий кенгашлари ва дирекцияларининг, жумладан, маҳаллий тадбиркорлик субъектларини жалб этиш масалаларида фаолиятини мувофиқлаштиради ҳамда самарадорлигини таҳлил қилади, кичик саноат зоналарининг маъмурий кенгашларига рақобатбардош замонавий ишлаб чиқаришни ташкил этишда кўмаклашади;

кичик саноат зоналарини ривожлантиришга хорижий инвестицияларни ва маҳаллий инвесторларни жалб этишда кўмаклашади, зарур инфратузилма объектларини ривожлантириш орқали улардан самарали фойдаланишни таъминлайди;

ҳудудлардаги фойдаланилмаётган корхоналар негизида ва бўш турган ер участкаларида ташкил этилган кичик саноат зоналарига жойлаштирилган тадбиркорлик субъектлари томонидан инвестиция мажбуриятларининг бажарилиши мониторинги олиб борилиши ва таҳлил қилинишини ташкил этади;

кичик саноат зоналари ҳудудида транспорт, муҳандислик-коммуникация ва ижтимоий инфратузилмани жадал ривожлантиришни ва улардан самарали фойдаланишни таъминлаш бўйича дастурларни ишлаб чиқишда иштирок этади;

кичик саноат зоналари фаолиятини самарали ташкил этиш, тадбиркорлик субъектларига қулай шарт-шароитлар яратиш мақсадида

рақобатбардош маҳсулотлар ишлаб чиқаришни кўпайтириш учун қонун ҳужжатларини янада такомиллаштиришга доир таклифларни белгиланган тартибда киритади;

кичик саноат зоналарининг самарали фаолиятини ташкил этиш, уларда рақобатбардош замонавий ишлаб чиқаришлар ва кичик корхоналарни ривожлантиришни таъминлайди.

Шунингдек, туман ҳокимининг ўринбосари қуйидаги қўшимча функцияларни амалга оширади:

инвестиция дастурларини амалга оширишда, жумладан, ҳудудий дастурларни шакллантириш, **хорижий инвестицияларни жалб этиш ва ўзлаштириш** соҳасида ҳудудда давлат бошқаруви органлари ва ташкилотларининг ҳудудий тузилмалари фаолиятини мувофиқлаштиради;

хорижий инвестицияларни жалб этиш, бунинг учун зарур шарт-шароитлар яратиш ва преференциялар бериш, тадбиркорлик субъектларига экспортда кўмаклашиш соҳасида вазирликлар, идоралар, республика ташкилотларининг ҳудудий тузилмалари фаолиятини мувофиқлаштиради;

ҳудуднинг экспорт салоҳиятини ошириш, ҳудудий корхоналар маҳсулотларининг экспорт ҳажмлари, **номенклатураси ҳамда географиясини кенгайтириш бўйича манзилли дастурлар кўрсаткичларининг ижросини таъминлайди;**

ёшларни илм-фан ва инновацион фаолиятга жалб қилиш, **илм-фан, таълим ва ишлаб чиқариш ўртасида интеграцияни кучайтириш** ҳамда инновациялар ва илғор юқори технологияларни жорий қилиш учун зарур шарт-шароит яратади;

олий ва юқори даражадаги ташрифлар яқунлари бўйича амалий тадбирлар режаларининг (“йўл хариталари”) бажарилишини таъминлайди ва тизимли назоратини олиб боради;

инвестициялар, экспорт ва инновацияларни қўллаб-қувватлаш, хусусийлаштирилган корхоналарга кўмаклашиш, эркин иқтисодий зоналарни ривожлантириш масалаларида **сайёр (очик) мажлисларни тизимли ўтказиш**.

3-боб. Туман ҳокими ўринбосарининг ҳуқуқлари ва жавобгарлиги

10. Туман ҳокимининг ўринбосари ўзига юкланган вазифалар ва функцияларни бажариш учун қуйидаги ҳуқуқларга эга:

кўриб чиқиладиган масалаларни таҳлил қилиш ва тайёрлаш учун зарур бўлган материаллар ҳамда маълумотларни давлат бошқаруви органлари ҳамда бошқа органлар ва ташкилотлардан белгиланган тартибда сўраш ва олиш;

давлат бошқаруви органлари, маҳаллий ижроия ҳокимияти органлари, бошқа ташкилотлар раҳбарлари ҳамда вакиллари иштирокида йиғилишлар ўтказиш, ваколати доирасига кирувчи соҳаларнинг самарали ишлаши ҳамда

уларни ривожлантириш бўйича тегишли давлат бошқаруви органларига кўриб чиқиш учун таклифлар киритиш;

бириктирилган вазирликлар, давлат қўмиталари ва идоралар, хўжалик бирлашмаларининг ҳудудий тузилмаларининг мажлисларида, шунингдек, туман ҳокими топшириқлари бўйича – бошқа давлат органларининг, нодавлат нотижорат ташкилотлари ва бошқа ташкилотлар ҳудудий тузилмаларининг ўзи юритадиган соҳага кирувчи масалалар бўйича ўтказиладиган мажлислари ва йиғилишларида қатнашиш;

олий ва юқори даражадаги ташрифлар якунлари бўйича амалий чора-тадбирлар режаларига (“йўл харита”ларига) киритиш учун бириктирилган ташкилотлар раҳбарлари билан биргаликда хорижий мамлакатлар билан ҳамкорликни чуқурлаштириш, шунингдек, тегишли тармоқ корхоналари ва ҳудудларнинг муаммоли масалалари бўйича таклифлар тайёрлаш;

давлат бошқаруви органлари, илмий муассасалар ва бошқа ташкилотларнинг ҳудудий тузилмалари раҳбарлари ҳамда вакиллари ҳокимликда кўриб чиқиладиган масалаларни ишлаб чиқиш учун белгиланган тартибда жалб этиш, тегишли масалалар бўйича вақтинча ишчи гуруҳлар тузиш.

11. Туман ҳокимининг ўринбосари ушбу Низомнинг 8 ва 9-бандларида ўзига юкланган вазифа ва функцияларнинг тегишли равишда ва самарали **бажарилиши учун шахсан жавобгардир.**

Туман ҳокимининг ўринбосари **Ўзбекистон Республикаси Президентининг “Қонунчилик ҳужжатлари ижросини самарали ташкил этишда давлат бошқаруви органлари ва маҳаллий ижро этувчи ҳокимият органлари раҳбарларининг шахсий жавобгарлигини кучайтиришга доир қўшимча чора-тадбирлар тўғрисида” 2021 йил 10 февралдаги ПФ–6166-сон Фармони,** “Ўзбекистон Республикаси Президентининг ҳужжатлари ва топшириқлари самарали ва натижали ижро этилиши, шунингдек, ижро интизоми мустаҳкамланиши учун Ўзбекистон Республикаси Президенти Давлат маслаҳатчиларининг, Вазирлар Маҳкамаси ва унинг комплекслари, давлат ва хўжалик бошқаруви органлари ҳамда барча даражалардаги ҳокимликлар раҳбарларининг шахсий жавобгарлиги тўғрисида” 2017 йил 11 апрелдаги ПҚ–2881-сон ҳамда **“Ijro.gov.uz” ижро интизоми идоралараро ягона электрон тизими самарали фаолият кўрсатишини таъминлашга қаратилган қўшимча чора-тадбирлар тўғрисида” 2021 йил 31 майдаги ПҚ–5132-сон** қарорлари шунингдек, Вазирлар Маҳкамасининг 1999 йил 12 январдаги “Ижро интизомини мустаҳкамлаш чора-тадбирлари тўғрисида”ги 12-сон қарорига мувофиқ ижро интизомига сўзсиз риоя этилишини таъминлаш учун жавоб беради.

12. Жисмоний ва юридик шахсларнинг мурожаатлари белгиланган тартибда кўриб чиқилишини таъминлайди, уларда қайд қилинган муаммолар ҳал этилиши юзасидан тегишли чораларни белгилайди.

13. Бириктирилган соҳаларда кадрларни тарбиялаш ва ўқитиш масалалари билан доимий шуғулланади, мажмуага кирадиган ташкилотлардаги раҳбарлик лавозимларига номзодлар бўйича таклифлар беради.

4-боб. Туман ҳокимининг ўринбосари фаолиятини ташкил этиш

14. Туман ҳокимининг ўринбосари фаолияти Ўзбекистон Республикасининг “Маҳаллий давлат ҳокимияти тўғрисида”ги Қонуни, Ўзбекистон Республикаси Президентининг ва Вазирлар Маҳкамасининг қарорлари, шунингдек, ушбу Низомга мувофиқ, туман ҳокимининг чораклик ва ярим йиллик иш режалари асосида ташкил этилади.

Ушбу иш режалар асосида туман ҳокими ўринбосарининг ойлик шахсий иш режалари ишлаб чиқилади ҳамда туман ҳокими томонидан тасдиқланади.

15. Туман ҳокимининг ўринбосари ҳисоботи туман ҳокимининг тезкор йиғилишларида **ҳар ҳафта** эшитиб борилади.

Ўзбекистон Республикасининг “Маҳаллий давлат ҳокимияти тўғрисида”ги Қонунига асосан туман ҳокими ўринбосарининг ҳисоботлари халқ депутатлари туман Кенгаши мажлисида эшитилади.

16. Туман ҳокимининг ўринбосари фаолияти самарадорлигини ҳамда мақсадли вазифаларга эришилишини баҳолаш, улар юзасидан ҳисоботларни эшитиш ва тегишли чораларни кўриш **Маҳаллий ижро этувчи ҳокимият органлари раҳбарлари ўринбосарлари фаолиятининг энг муҳим самарадорлик кўрсаткичларини ишлаб чиқиш, мониторинг қилиш ва баҳолаш тартиби тўғрисидаги низомга** мувофиқ амалга оширилади.

17. Туман ҳокимининг ўринбосари фаолияти тегишли бўлим томонидан таъминланади.

**Туман ҳокимининг ўринбосари томонидан ўзаро ҳамкорлиги
таъминланадиган ташкилотларнинг ҳудудий бўлинмалари
РЎЙХАТИ**

1. Иқтисодий тараққиёт ва камбағалликни қисқартириш бўлими – инвестиция ва экспорт масалалари бўйича.

2. Туман қурилиш бўлими – инвестиция лойиҳалари экспертизаси масалалари бўйича.

3. Тижорат банкларининг ҳудудий филиаллари – инвестиция лойиҳаларини молиялаштириш ҳамда олий ва юқори даражалардаги ташрифлар яқунлари бўйича амалий тадбирлар режаларини (“йўл харита”лари) ишлаб чиқиш ва уларнинг самарали амалга оширилиши устидан мониторинг олиб бориш масалалари бўйича.

4. Бош вазирнинг тумандаги Тадбиркорлар мурожаатларини кўриб чиқиш қабулхонаси – инвесторлар, хусусийлаштирилган корхоналар, эркин иқтисодий зоналар иштирокчиларининг мурожаатларини кўриб чиқиш ва ҳал этиш масалалари бўйича.

5. Илмий ташкилотлар, инновацион лойиҳалар-стартапларни ишлаб чиқиш, синовдан ўтказиш ва ўзлаштириш, инновацион фаолият натижаларини трансфер қилиш ва тижоратлаштиришни амалга оширувчи инновацион ғоялар, ишланмалар ва технологиялар марказлари.

6. Вазирликлар, идоралар, хўжалик бирлашмалари ва бошқа ташкилотлар ҳудудий бўлими – инвестициялар, инновацион фаолият, эркин иқтисодий зоналар масалалари бўйича.